

KERATAN AKHBAR

TARIKH : 28 JULAI 2023
AKHBAR : BERITA HARIAN
MUKA SURAT : 7

NETR garis 10 inisiatif raih potensi pelaburan

NETR garis 10 inisiatif raih potensi pelaburan

Pelan Hala Tuju Peralihan Tenaga Negara buka lebih banyak pekerjaan berpendapatan, bernilai tinggi

Oleh Mahanum Abdul Aziz
mahanum_aziz@bh.com.my

Pelan Hala Tuju Peralihan Tenaga Negara (NETR) Fasa Pertama yang dilancarkan semalam memperkenalkan 10 inisiatif pemangkin meluas yang akan membuka peluang pelaburan antara RM435 bilion hingga RM1.85 trilion menjelang 2050.

Menteri Ekonomi, Rafizi Ramli, berkata NETR akan membantu mengubah ekonomi negara dengan membuka usaha sama menguntungkan yang juga baik untuk alam sekitar dan ekonomi.

Beliau berkata, pelancaran NETR juga menandakan peruba-

han penting dalam pemikiran dan ia bukan sahaja dokumen yang mengandungi langkah sementara untuk memenuhi sasaran sifar bersih negara, tetapi ia adalah gabungan strategi dan inisiatif yang boleh mengubah ekonomi, mata pencarian dan kedudukan negara di dunia.

Katanya, 10 inisiatif pemangkin itu juga akan menentukan pemikiran dasar dan hala tuju ekonomi dalam tahun akan datang.

"Salah satu projek ialah Zon Tenaga Boleh Baharu (TBB) bersepadu yang akan dipacu Khazanah Nasional Bhd dan dijalankan melalui usaha sama antara UEM dan ITRAMAS. Dengan satu gigawatt (GW), loji jana kuasa fotovoltaik solar hibrid (PV) itu adalah yang terbesar seumpamanya di Asia Tenggara.

"Skala cita-cita kita telah menarik pelaburan global berprofil tinggi daripada blok ekonomi utama berjumlah RM6 bilion," katanya pada pelancaran NETR Fasa Pertama sempena Invest Malaysia anjuran Bursa Malaysia Bhd bersama Maybank dan CLSA di sini, semalam.

Hadir sama, Menteri Sumber



Rafizi (tengah) melancarkan Pelan Hala Tuju Peralihan Tenaga Nasional (NETR) di Kuala Lumpur, semalam, sambil diperhati Abdul Wahid (kiri), Nik Nazmi (dua dari kiri) dan Muhamad Umar (kanan). (Foto BERNAMA)

Asli, Alam Sekitar dan Perubahan Iklim (NRECC), Nik Nazmi Nik Ahmad, Pengerusi Bursa Malaysia, Tan Sri Abdul Wahid Omar dan Ketua Pegawai Eksekutif Bursa Malaysia, Datuk Muhamad Umar Swift.

Mengulas lanjut, Rafizi berkata, NETR juga membuka pintu masuk hidrogen di Sarawak ketika ia melaksanakan projek untuk muncul sebagai hab hidrogen di negara ini dan melaksanakan rangka kerja penangkapan dan penyimpanan karbon (CCS) supaya projek pemangkin boleh dilaksanakan dalam tempoh dua tahun ini.

Beliau berkata, kerajaan akan terus memanfaatkan kos teknologi yang semakin berkurangan dalam TBB dan membina kelebihan pengerak pertama semasa menggerakkan pelaburan ke dalam kawasan pertumbuhan tinggi dan bernilai tinggi itu.

Katanya, dengan peningkatan pelaburan yang dirangsang oleh NETR, lebih banyak pekerjaan berpendapatan dan bernilai tinggi juga akan diwujudkan.

"Fasa pertama NETR sahaja dianggarkan membawa kira-kira 23,000 pekerjaan berimpak tinggi. Ini bermakna lebih banyak keluarga mampu mendapatkan kehidupan yang lebih selesa dan terjamin, memberikan pendidikan yang lebih baik kepada anak-anak mereka dan menjaga ibu bapa mereka dengan lebih baik.

"Tbu bapa yang bekerja dalam pekerjaan tenaga bersih juga akan berasa lebih puas pada pekerjaan yang memberi kesan yang melindungi masa depan anak-anak kita. Ini bukan sekadar rancangan, ia juga adalah dasar yang berjalan," katanya.

Tenaga bersih pilihan relevan

Rafizi berkata, NETR juga direka untuk menjadikan tenaga bersih pilihan yang relevan dari segi kewangan kepada kebanyakan isi rumah.

Beliau berkata, daripada meminta setiap isi rumah membayar untuk panel solar yang mahal, sebaliknya menawarkan peluang pendapatan.

"Dalam setiap rumah, kami

berhasrat untuk memberi pilihan isi rumah untuk memajak bumbung mereka sebagai pulangan untuk pendapatan bulanan yang boleh mengurangkan bil elektrik mereka dan meletakkan lebih wang tunai di dalam poket mereka," katanya.

Rafizi berkata, kerajaan juga menerajui perkara itu dengan memperuntukkan RM80 juta untuk panel solar dipasang di atas bumbung bangunan kerajaan.

Beliau berkata, kerajaan juga mahu melihat panel solar dipasang di seluruh negara, meliputi pejabat, kilang, dewan pelbagai guna dan semua jenis bangunan.

"Bagi meningkatkan lagi kesedaran ini, rakyat Malaysia juga boleh menyumbang minyak masak yang digunakan dan bahan buangan sebagai bahan mentah untuk biojisim dan biofuel.

"NETR juga akan dirasai di jalan raya. (Sebanyak) 10,000 stesen pengecas akan dipasang di sepanjang lebuh raya dan bangunan komersial menjelang 2025 dan pengangkutan awam juga akan dibekalkan elektrik," katanya.